

# Eclesiastés

## *Nochi san tlapic*

<sup>1</sup> Ya ni tlen quiijcuilo Tlamachtijquetl Salomón, icono David, tlen elqui tlanahuatijquetl ipan altepetl Jerusalén.

<sup>2</sup> Na niquitztoc para nochi tlamantli san tlapic huan ax tleno nelía huejcahuas huan ipati para nochipa. Queja nopa niquijtohua na tlen nicanalojquetl.

<sup>3</sup> ¿Tlachque quitlani se tlacatl ica nochi itequi tlen ohui tlen quichihua ipan ni tlaltepactli?

<sup>4</sup> Nochi tlacame tlen ama itztoque miquise huan sequinoc tlacatise. Teipa yajuanti nojquia miquise. Pero ni tlaltepactli, quena, ya nopa nochipa mocahua.

<sup>5</sup> Quisa tonati ica ijnaloc huan oncalaque ica tiotlac. Teipa nimantzi sampa pehua motlalohua hasta ajsi campa quistehua para sampa quisas.

<sup>6</sup> Nopa ajacatl tlailpitza ica tlani huan mocuepa huan tlailpitza ica ajco huan sampa quichihua seyoc huelta nica huan neca. Ax cana ajsiti para nopano mocahuas.

<sup>7</sup> Nochi atemitl motlalojtiyohuij hasta nopa hueyi atl, pero nopa hueyi atl ax quema temi. Huan nopa atl ipan hueyi atl sampa tlejco para huetzis huan ajsis ipan nopa hueyame campa hualajqui huan sampa motlalohuaj para ajsitij ipan hueyi atl.

<sup>8</sup> Nojquia ihuical ica tlacame. Nochi tlamantli san techchihuilá tlahuel ma tisiyahuica huan

ma timocuesihuiltica. Toixtiyolhua ax quema tlaxicohuaj ica tlen quinequij quiitase. Huan tonacashua ax quema ixhuij ica tlen quicaquij. Nochipa tlachixtoque huan tlacactoque para más tlachiyase huan tlacaquise.

<sup>9</sup> Nochi tlamatli tlen panoque achtohuiya, sampa panose teipa. Nochi tlen ama pano, ya panotoc achtohuiya. Ax onca niyon se tlamatli tlen yancuic ipan ni tlaltepactli.

<sup>10</sup> ¿Tlachque tlamatli hueli tiquijtose para yan-  
cuic? ¡Niyon se! Nochi tlamatli tlen amantzi  
pano, nojquiya ihuical panotoc achtohuiya.

<sup>11</sup> Axaca quinilnamiqui nopa tlacame tlen hue-  
jcrajquiya itztoyaj huan tlachque panoc ipan inin-  
nemilis. Huan nojquiya nochia tlacame tlen teipa  
tlacajtiyase huan tlen quichihuase nojquiya ax  
quiilnamiquise nopa tlacame tlen tlacatise teipa  
quema yajuanti ya mictose.

### *Inemilis Salomón*

<sup>12</sup> Na tlen nicamati nieltoya nitlanahuatijquetl  
ipan tlali Israel huan niitzoya ipan altepetl  
Jerusalén.

<sup>13</sup> Huan nimotemamac para ica miyac  
tlalnamiquistli nimomachtis huan nijmachilis  
nochi tlamatli tlen tlacame quichihuaj ipan  
ni tlaltepactli. Huan nijpanti para nopa tequitl  
tlen Toteco quinmacatoc tlacame para ipan ma  
timotequihiuica, nelohui.

<sup>14</sup> Quena, cuali nijtlachili nochia tlamatli tequitl  
tlen quichihuaj tlacame ipan ni tlaltepactli huan  
niquitac para nochia eliyaya san tlaptic. San qui-  
hualica tlaxicoli huan cuesoli pampa san tlaptic

queja san tlapic intla se quinequi quiitzquis nopa ajacatl tlen tlailpitztoc.

<sup>15</sup> Se tlamantli tlen huijcoltic ax hueli tijchihuas xitlahuac. Huan se tlamantli tlen ax onca, ax huelis tijpohuas.

<sup>16-17</sup> Huajca nimoyolilhui: “Xiquita, nica niitztoc tlen más njipiya notlalnamiquilis que nochí sequinoc nopa tlanahuatiani tlen tlanahuatijque achtohuiya ipan altepetl Jerusalén. Más nimochijtoc hueyi huan nochí nimomachtijtoc huan más njimati que nochí sequinoc tlacame. Nojquiya njchijtoya miyac tequitl para njmachilis tlen huihuitic huan tlen san tlapic. Huan yonque njchijtoc nochí ya ni, ¿tlachque ipati tlen njchijtoc? Huan niquitac nochí tlen njchijtoya para san nechsiyahuiltijtoya huan ax tleno tlen cuali quisqui tlen nochí notequi. Elqui queja nimotlalo-huayaya para niquitzquisquía nopa ajacatl tlen tlailpitzayaya.”

<sup>18</sup> Pampa quema se tlacatl más mochihua tlalanamiqui, más mohueyilía icuesol. Huan quema se más quimati, más mohueyilía itlacuajcualol.

## 2

### *San tlapic nochí tlamantli paquelistli*

<sup>1</sup> Ipan noyolo nimoilhui: “Nijyejyeco paquelistli intla ya nopa tlen ipati. Huajca nimoilhui nimopaquilismacas hasta niixhuis. Huelis ya nopa tlen ipati ipan ni yolistli.” Pero niquitac paquelistli nojquiya elqui san tlapic.

<sup>2</sup> Nelía se huihuiyotl para tihuetzcas nochí tonali pampa paquelistli ax tleno mitzpalehuis.

**3** Teipa nimoyolilhui miyac huan nimoilhui para nijyejyecos para nimopaquilismacas ica tlailistli huan noja nijtemos tlalnamiquistli. Huan quema ya nopa nijchihuayaya nijpanti para nojquiya eliyaya se huihuiyotl. Nimoilhuiyaya huelis ica xocomeca atl tlen cococ nijpantisquía nopa tlasehuilistli tlen nochi tlacame quitemhauaj ipan ininnemilis, pero axtle.

**4** Teipa nimoilhui para nijtemos paquelistli ica huejhueyi tequitl tlen nijchihuasquía. Huan nimochijchihuili huejhueyi caltini huan nojquiya niquintojqui xocomeca milme.

**5** Huan niquintojqui miyac cuamili huan xochimili, huan nopano niquintojqui nochi tlamantli cuatini tlen temacaj inintlajca.

**6** Huan nojquiya niquinchijchijqui huejhueyi piletas para quicuis miyac atl para nicatequis nopa miyac cuatini tlen niquintojqui.

**7** Teipa niquincojqui tlaca tequipanohuani huan sihua tequipanohuani huan nojquiya miyac notlatequipanojcahua ipan nochaj quintlacatiltijque coneme para elise noaxcahua. Nojquiya niquinpixqui tlahuel miyac huacaxme huan borregojme hasta niquinonpanoc ininmiyaca tlen quinpixtoyaj nochi sequinoc tlanahuatiani tlen tlanahuatijque achtohui tlen na ipan altepetl Jerusalén.

**8** Huan nijsentili miyac plata tomi huan oro tomi tlen ica nechtlaxtlahuiyayaj impuesto miyac tlanahuatiani huan tequihuejme tlen campa hueli tlaltini. Nojquiya niquinpixqui miyac huicaní huan tlatzotzonani tlen tlacame huan sihuame. Huan nijpixqui nochi tlamantli tepos tlatzotzon-

ali.

<sup>9</sup> Huajca nelía nimohueyichijqui ipan nochí tlamanatlí hasta niitztoya más nihueyi que nochí nopa tlanahuatiani tlen achtohuiya tlanahuati-jque ipan altepetl Jerusalén. Pero ipan nochí tlamanatlí tlen njchijqui noja ninemiyaya ica miyac tlalnamiquistli.

<sup>10</sup> Nimoaxcatiyaya nochí tlamanatlí tlen niquix-tocayaya. Huan tlen hueli tlamanatlí tlen elqui quentzi se paquelistli huan njnequiyaya njchihuas, huajca njchijqui. Huan njipanti paquelistli ipan notequi yonque nelía elqui ohui. Nopa paquelistli tlen nijseli tlen notequi elqui notlaxt-lahuil ipampa nochí nopa miyac tequitl tlen njchijqui.

<sup>11</sup> Teipa nijtlachili nochí nopa huejhueyi tlamanatlí tequitl tlen njchijtoya huan niquitac para nochí eliyaya san tlapic huan san nechsiyahuiti-jtoya. Ax tleno tlen njchijtoya ipan ni tlaltepactli nelía ipati huan huejcahuasquía.

<sup>12</sup> Huajca pejqui nijtlajtlachilía nopa tlalnamiquistli huan nopa huihuiyotl para njmatis catlía más ipati. Huan ajqueya hueli tlanahuatijquetl tlen hualas teipa ax tleno huelis quichihuas tlen yancuic, que tlen ya eltoc.

<sup>13</sup> Quena, quijitos para nopa tlalnamiquistli achi más ipati huan ax huihuiyotl. Ihuical queja nopa tlahuili achi más cuali que nopa tzintlay-ohuilotl.

<sup>14</sup> Pampa se tlacatl tlen tlalnamiqui tlachiya campa nejnemi. Pero nopa huihui tlacatl, yajaya nejnemi queja elisquía campa tzintlayohua.

Pero nojquiya niquitac para onca se tlamantli tlen quinajsi nochí ome.

<sup>15</sup> Quena, se huihui tlacatl miquis huan na nojquiya nimiquis. Huajca ¿para tlen nitequititoc nelchicahuac hasta ama para noja más nimochihuas nitlalnamiqui? Huajca nimomacac cuenta para nopa tlalnamiquistli nojquiya ax nelía ipati.

<sup>16</sup> Pampa se tlen tlalnamiqui miquis huan se tlen huihuitic nojquiya miquis. Huan teipa ica miyac tonali ayoc aquí quinilnamiquis.

<sup>17</sup> Yeca nelía niquijixqui ni yolistli, pampa nochí tlamantli tequitl tlen nijchijtoya ipan ni tlaltepactli san nechsiyahuiltijtoya huan nechcuesolmacac. San tlapic notequi queja san tlapic intla se quinequisquía quiitzquis nopa ajacatl tlen tlailpitztoc.

<sup>18</sup> Nojquiya niquijixqui nochí notequi tlen nijchijtoya ipan ni tlaltepactli pampa teipa hualas seyoc huan yajaya moaxcatis nochí tlen nijpixtoc.

<sup>19</sup> Huan ¿ajqueya huelis quimatis intla elis tlalnamiqui o huihuitic? Pero yonque mochihuas tlalnamiqui o huihuitic, yajaya quiselis nochí tlen nijtlantoc ica nochí notequi tlen nijchijtoc ica miyac tlalnamiquistli ipan ni tlaltepactli. Huajca niquitac san tlapic nochí notequi.

<sup>20</sup> Huajca pejqui nimocuesohua ica nochí nopa huejhueyi tequitl tlen nijchijtoya. Pampa nelía tlahuel nimosiyahuiltijtoya ica nochí nopa tlamantli tlen nijchijtoya ica miyac notlalnamiquilis.

<sup>21</sup> Pero yonque ipan nochí nonemilis nijtemotoc para nijchihuas notequi ica tlalnamiquistli, tlaixmatilistli huan yajatili, teipa monequi nijcategoimaco se tlen ax mosiyahuiltijtoc niyon

quentzi ipan nopa tequitl. Huajca ya nopa se tlamatli tlen ax cuali huan nelía se hueyi hui-huiyotl.

<sup>22</sup> Intla queja nopa, huajca ¿tlachque quitlani se tlacatl tlen nochi itequi ipan ni tlaltepactli tlen moisihuáltia quichihua huan ica tlen mosiyahuáltia miyac?

<sup>23</sup> Pampa mojmostla ipan itequi quipano tlacuacualocayotl huan cuesoli huan hasta tlayohua nojquiya ax cochi pampa moilhuía tlen itequi. Pero nochi ya nopa san tlaptic eltoc.

<sup>24</sup> Huajca niquitac para ax onca tleno más cuali huan ipati para se tlacatl, san ma quicuas tlen quinequis huan quiis tlen quipactía huan quichihuas nopa tequitl tlen más quipaquilismacas pampa nopa paquilibrium huala tlen Toteco.

<sup>25</sup> Huan intla Toteco amo techmaca itlapale-huil, ¿ajqueya huelisquía tlacuas huan quipiyas paquilibrium?

<sup>26</sup> Intla se tlacatl quichihua tlen quipactía Toteco, Toteco quimacas tlalnamiquistli, tlaximatilistli huan paquilibrium. Pero íca se tlajtlacolchijquetl Toteco quitequimacas para tequitis miyac huan moricojchihuas para quimactilis nopa ricojyotl se tlen quichihua tlen quipactía Toteco. Nochi ya nopa nojquiya san tlaptic huan san quihualica cuesoli. San tlaptic eltoc queja san tlaptic intla se quinequisquía quiitzquisquía nopa ajacatl tlen tlailpitztoc.

### 3

*Nochi tlamatli quipiya quema ipohual para*

*mochihuas*

- <sup>1</sup> Toteco quitlalijtoc se cuali hora para sesen tlamantli.  
 Nochi tlamantli tlen monequi tijchihuase quipiya tonali quema mochihua.
- <sup>2</sup> Onca se tonal para titlacatis huan onca se tonal para timiquis.  
 Onca tonali para titlatojtucas huan onca tonali para tijhuihuitlas tlen tijtoctoc.
- <sup>3</sup> Onca tonali para titlamictis huan onca tonali para titepajtis.  
 Onca tonali para titlaxolehuas huan onca tonali para tijcualchijchihuas.
- <sup>4</sup> Onca tonali para tichocas huan onca tonali para tihuetcas.  
 Onca tonali para timocuesos huan onca tonali para timijtotis.
- <sup>5</sup> Onca tonali para tiquinsemanas tetini huan onca tonali para tiquinsentilis.  
 Onca tonali para tijcuanajnahuas se tlacatl huan onca tonali para ax tijchihuas.
- <sup>6</sup> Onca tonali para tijtemos huan tijpantis tlamantli huan onca tonali para tijpolos.  
 Onca tonali para titlaajcocuis huan onca tonali para tijtepehuas tlen ticajcoctoc.
- <sup>7</sup> Onca tonali para tijtzayanás se tlenijqui huan onca tonali para tiquijtzomas tlen tzayantoc.  
 Onca tonali para timocamatzacuas huan onca tonali para ticamatis.
- <sup>8</sup> Onca tonali para titeicnelis huan onca tonali para titecocolis.

Onca tonali para tlatehuilistli huan onca tonali para tlasehuilistli.

<sup>9</sup> Huajca ¿tlachque quitlani se tlacatl tlen nochí itequi tlen ohui tlen ica mosiyahuiltía?

<sup>10</sup> Na nimoilhuijtoc miyac tlen nochí nopa miyac tlamantli tequitl tlen Toteco quinmacatoc tlacame para ipan ma motequihuica. Huan ya ni tlen niquita.

<sup>11</sup> Toteco quichijtoc para sesen tlamantli ma eli cuali huan ma mochihua ipan nopa tonali tlen quinamiqui. Nojquiya quitlalijtoc ipan iyolo sesen tlacatl para ma quimati tlen nelía ya ax quema miquis. Nojquiya quimati para nopa tlamantli tlen nelía ipati ipan ni tlaltepactli huejcahuas para nochipa. Pero niyon se tlacatl ax yajati quimachilía nochí itlalnamiquilis huan itequi Toteco tlen yajaya quichijtihualajtoc tlen ipejya huan nochí tlen quichijtiyas hasta itlamiya tonali.

<sup>12</sup> Huajca ax onca seyoc tlamantli tlen achi cuali para tlacame. San monequi paquise huan quichihuase tlen cuali quema noja yoltoque.

<sup>13</sup> Cuali para quipantise paquilistli ica tlen quicuase huan tlen quiise, huan ica nopa tequitl tlen quichihuase. Pampa ni paquilistli eltoc queja se regalo tlen Toteco techmacatoc.

<sup>14</sup> Nijmati para nochí tlen quichihua Toteco, huejcahuas para nochipa. Ipan nochí tlen quichijtoc ax tleno hueli más tijhueyilis, niyon ax tleno hueli tijquixtilise. Toteco quichihua ya nopa para ma quihueyitlepanitaca huan ma quiimacasica nochí tlacame.

<sup>15</sup> Nochí tlen onca ama, ya oncac huejcajquiya. Huan nochí tlen oncas teipa, nojquiya ya oncatoc.

Toteco quichihua para sampa ma onca tlen huej-cajquiya oncac huan ixpolijqui.

*Tlamantli tlen ax xitlahuac ipan ni nemilistli*

<sup>16</sup> Nojquiya huelqui niquitac ipan nochí tlaltepactli para onca tlen fiero huan onca tlajtacolotl campa quinamiqui oncas tlen xitlahuac. Quena, jueces tlen inintequi para tetlajtolsencahuase xitlahuac mocuapolojtoque huan quichihuaj tlen fiero.

<sup>17</sup> Huan nimoyolilhui: “Ipan nopa tonal tlen Toteco quitlalijtoc, yajaya quintlajtolsencahuas nochí tlacame yonque cuajcualme huan ax cuajcualme.”

<sup>18</sup> Huan huajca niquitac para Toteco quincahuilia tlacame ma quitoquilica nopa fiero ojtli tlen quinequij para quinyejyecos. Queja nopa yajuanti quiitase para ihuical ininpantis queja tlapiyalime pampa nochí ome miquise.

<sup>19</sup> Pampa nochí tlacame huan tlapiyalime quijiyotilanaj san se ajacatl huan nochí ome miquij. Huajca tiquitaj para tlacame ax más huejhueyi que tlapiyalime. Nyon se ax huejcahuas. San tlaptic itztoque.

<sup>20</sup> Nochí ome yahuij ipan ihuical lugar. Nochí ome hualajque tlen tlaltejpocli huan sampa mocuepase tlaltejpocli.

<sup>21</sup> Pampa ¿ajqueya hueli quinextilis ica temachili intla itonal se tlacatl yahui huejcapa huan itonal se tlapiyali yahui tlatzintla?

<sup>22</sup> Huajca nijmachili para monequi se tlacatl ma paqui ica itequi ipan ni tlaltepactli pampa ya nopa itlaxtlahuil. Ax onca seyoc tlamantli tlen achi

cuali para quichihuas. Pampa quema yajaya ya mictos, ax aqui huelis sampa quimacas yolistli seyoc huelta para ma mopaquilismacas ica tlen oncas teipa tlen imiquilis. Yeca sesen tlacatl ma mopaquilismaca ama.

## 4

<sup>1</sup> Sampa niquitac nochí nopa tlaijiyohuilstli, cuesoli huan tlaohuijcayotl tlen onca ipan ni tlaltepactli. Niquinitac tlacame tlen chocaj pampa sequinoc quintlaijiyohuiltíaj huan ax tleno hueli quichihuase para momanahuise. Axaca quinyoltlália, niyon ax aqui quinpalehuía pampa tlen quintlaijiyohuiltíaj quipiyaj miyac chicahualistli.

<sup>2</sup> Huajca nijmachili para más cuali itztoque nopa tlacame tlen ya mijque huan ax tlen noja yoltoque.

<sup>3</sup> Huan noja más cuali yajuanti tlen ax quema tlacajtoque pampa ax quema quiitztoque nochí tlen ax cuali tlen onca ipan ni tlaltepactli.

<sup>4</sup> Huan niquitac quema se tlacatl quichihua huejhueyi tequitl huan nochí tlen quichihua quisá cuali, teipa sequinoc tlacame pehuaj quicocoliaj. Huajca nochí itequi quisá san tlápic huan san quihualicac cuesoli.

<sup>5</sup> Tlacame tlen huihuitique ax quinequij tequitise huan yeca mocahua ica mayantli.

<sup>6</sup> Yajuanti moilhuíaj para más cuali motlatzcanequise huan ax tequitise. Ax quinequij tequitise pampa moilhuíaj nochí tequitl quisas san tlápic huan san quinsiyahuiltis.

*Techpalehuía tohuampoyohua*

**7** Nojquiya niquitztoc seyoc tlamantli tlen san tlapic ipan ni tlaltepactli.

**8** Niquita se tlacatl tlen itztoc iseli. Ax quinpiya iconehua, niyon iicnihua, pero mojmostla tequiti chicahuac pampa, yonque miyac tomi quiyiya, quinequi para noja más moricojchihuas. Huan ax motlatzintoquilía: “¿Ajqueya nijcahuilijtehuas noricojyo quema nimquis? ¿Para tlen tlahuel nimosiyahuiltía huan ax nimopaquilismaca ica nochí tlen nijpiya?” San tlapic nochí tlen quichihua nopa tlacatl huan tlahuel ohui inemilis.

**9** Achi más cuali quema ome tlacame tequitij san sejco huan ax tequiti setzi iseli. Más quitlanise san sejco que quitlanisquía intla tequitisquía iyoca.

**10** Intla se huetzis, huajca ne se quitlalanas. Pero teicnelti nopa tlacatl tlen itztoc iseli. Pampa intla huetzis, ax aqui quiyiwas para quitlalanas.

**11** Huan nojquiya quema tlaseseya, intla ome motecase san sejco ica se tlaquemidl, huajca momacase tlatotonilotl huan ax sesecuisse. Pero se tlacatl tlen itztoc iseli ¿quejatza huelis mototonilis?

**12** Huan quema se tlacatl itztoc iseli, sequinoc huelis quitehuise huan quitlanise. Pero intla itztoque ome, huajca ax quintlanise. Huan noja más cuali intla itztoque eyi. Onca se tlajtoli tlen quiijtohua para se mecatl tlen quixinpalojtoque ica eyi pilmecatzitzi, ax nimantzi cotonis.

### *Más ipati tlalnamiquistli huan ax tomi*

**13** Más cuali se telpocatl tlen teicneltzi huan tlalnamiqui que se rico tlanahtujquetl tlen huehuentzi huan huihuitic, huan ayoc quinequi quicaquis consejos.

<sup>14</sup> Se telpocatl tlen tlalnamiqui huelis quisas tlen se tlatzactli huan quipantis se nemilistli tlen nelcuali. Huelis elis tlanahuatijquetl yonque tlapacatqui nelteicneltzi ipan nopa tlali.

<sup>15</sup> Huan miyac tlacame ipan ni tlaltepactli quipiyasquíaj paquelistli para quipalehuise se telpocatl queja nopa, hasta quipalehuisquíaj mochihuas tlanahuatijquetl.

<sup>16</sup> Se telpocatl tlen queja nopa tlalnamiqui huelis quinyacanas tlahuel miyac tlacame, huan noch i quiicnelise. Pero teipa quema tlacajtiyase sequinoc tlacame, yajuanti quihuejcamajcahuase. Yeca tlen quichihuasquía elisquía san tlapic queja san tlapic para se tlen quinequisquía quiitzquis nopa ajacatl tlen tlailpitztoc.

## 5

### *Xijtlamichihua tlen tijtencahuilía Toteco para tijchihuas*

<sup>1</sup> Quema tiya ipan ichaj Toteco, cuali xitlacquaqui huan ax nimantzi xicamatí. Amo xijmaca nopa tlacajcahualistli tlen huihui tlacame quimacaj. Pampa huihui tlacame nimantzi quitencahuilíaj Toteco para quichihuase miyac tlamantli yonque ax quema quinchihuaj. Nyon ax moilhuíaj intla elqui se tlajtlacoli tlen quiijtojque.

<sup>2</sup> Huajca amo xicamatí nimantzi, niyon ax nimantzi xijtencahuili Toteco para tijchihuas se tlenijqui. Pampa Toteco itztoc nepa elhuicac huan ta tiitztoc ipan ni tlaltepactli. Huajca amo xicamatí miyac iiuxpa.

**3** Quema se tlahuel motequihuía ica miyac tlamantli tequitl, pehua quipiya temictli. Nojquiya se tlacatl tlen quipactía camatis miyac, teipa mocuepas se huihui tlacatl.

**4** Huajca quema tijtencahuilia Toteco tlen tijchihuas, nimantzi xijchihua tlen tiquilhuijtoc. Pampa Toteco ax quincualita tlen huihuitque. Monequi xijchihua nochí tlen tijtencajtoc para tijchihuas.

**5** Más cuali para ax tijtencahuas para tijchihuas se tlenijqui huan ax tijtencahuas huan teipa ax tijtlamichihuas.

**6** Quema tijtencahua se tlamantli huan ax tijchihua, nelía mocamac tlen mitzchihualti titlajt-lacolchihuas. Nojquiya amo ximomanahui huan xiquijto iixpa elhuicac ehuani para timocuapolo quema tijtencahuili tlen tijchihuasquia. Intla queja nopa tiquijtos, tijcualancamacas Toteco huan yajaya hueli quitlamixolehuas nochí tlen tijchijtoc.

**7** Intla se temiqui tlen miyac tlamantli tlen quinequi quichihuas pero ax tleno quichihua, san huihuitic. Intla camati miyac huan ax tleno quichihua, san tlapic. Más cuali xijtlepanitaca huan xiquimacasica Toteco.

### *Tlen ax ipati ipan tonemilis*

**8** Intla ipan se estado ipan ni tlali tiquitas para se rico quitlaijiyohuiltia se tlen teicneltzi huan ax quichihuilá tlen xitlahuac, amo ximosentlachili. Sesen tequihuejquetl quipiya seyoc tlen quinahuatía, huan tlen quinahuatía ya nojquiya quipiya seyoc tlen quitlachilá. Huan itztoc seyoc más

huejcapa tlen nopa ome huan teipa itztoc nopa hueyi tlanahuatijquetl. Huan pampa nochimoi-xmatij, tlahuel ohui para quixitlahuase tlen tetlaijiyohuiltia.

<sup>9</sup> Nopa tlali huan tlen quieliltia pano ipan inimma nochimoi-xmatij tlen quipiyaj tlanahuatili. Hasta nopa tlanahuatijquetl quiselia tlen temaca nopa tlali yonque nelia amo xitlahuac queja quichihuaj.

<sup>10</sup> Pero yonque se tlacatl tlahuel quinequi quipiyas tomi, ax quema quipiyas hasta ayoc quinequis. Huan tlen quinequi elis rico, ax quema moilhuia para ya quipiya miyac ricojyotl.

<sup>11</sup> Pampa quema se tlacatl quimiyaquilia itomi, nojquiya momiyaqwilaj tlen quitequihiuj huan quitlamiltiaj. Huajca ¿tlachque mitzpalehuis nopa ricojyotl intla san tlalochtlamis moi-xpa?

<sup>12</sup> Se tlacatl tlen tequiti chicahuac, cochi cuali yonque quipiya miyac itlacualis o pilquentzi. Pero se tlacatl tlen rico tlahuel mocuesohua huan ax cochi pampa quiimacasi quipolos nochimoi-xmatij tlen quipiya.

<sup>13</sup> Seyoc tlamantli tlen nojquiya san tlapic tlen niquitztoc ipan ni tlaltepactli eltoc para se tlacatl quiajcocuis itomi huan teipa quitequihiuis ipan tlamantli tlen ax cuali para ya.

<sup>14</sup> Nojquiya hueli quitlalis itomi ipan tlamantli tlen ax quisa cuali huan quitlamis itomi. Queja nopa ax tleno mocahuas para quiselise iconehua teipa.

<sup>15</sup> Sesen tlacatl tlacati xolotl huan queja nopa sampa mocuepas quema miquis. Axaca huelis quihiucas niyon se tlamantli tlen ica mosiyahuiltijtoc nica.

**16** Ya nopa nelía se hueyi cuesoli pampa san tlapic itequi se tlacatl. Quistehuas tlen ipan ni tlaltepactli ihmical queja ajsico. Nochi itequi san quihuicac ajacatl.

**17** Huan nochi tonali ipan iyolis, eltoc queja yajaya nemi ipan tzintlayohuilotl huan miyac tlamantli quitzacuilia. Mocuesohua huan tlaijyohuía miyac.

**18** San ni tlamantli tlen cuali para se tlacatl. Monequi ma tlacua cuali, huan ma quii se xocomeca atl tlen ajhuiyac huan ma mopaquilismacas ipan itequi nochi tonali tlen Toteco quimacas para ma itzto.

**19** Huan nelía cuali intla se tlacatl quiselijtoc tlen Toteco ricojyotl huan chicahualistli. Huan intla queja nopa Toteco quimacatoc, ma mopaquiliismacas ica tlen quiselijtoc. Intla se tlacatl paqui ipan itequi huan ica nopa tlamantli tlen quipantía ipan iyolis, huajca nelía cuali. Ipaquilis tlen quipiya eltoc queja se regalo tlen Toteco.

**20** Se tlacatl tlen queja nopa paqui ipan inemilis, ax mocuesohua ipampa tlen panotoc ipan iyolis, pampa Toteco quitemiti iyolo ica paquillistli.

## 6

**1** Onca seyoc tlamantli tlen ax cuali tlen na niquitztoc ipan nochi tlaltepactli.

**2** Toteco quinmacatoc sequin tlacame huejhueyi ricojyotl huan tlatlepanitacayotl tlen quinpalehuisquía quipiyase nochi tlen yajuanti quinequij, pero ax quinmacatoc chicahualistli para itztose para quitequihuise cuali. Miquij nimantzi huan

nochi tlen quiipyaj moaxcatíaj sequinoc. Ya nopa nelía san tlapic huan ax cuali.

<sup>3</sup> Yonque se tlacatl quinpiyas 100 itelpocahua huan miyac iichpocahua huan huejcahuas itztos hasta elis huehuentzi, intla ax quipantía paquelistli ipan inemilis huan quema miquis ax quicajtehuas se quentzi tomi para ica quitlalpachose, na niquijtohua para nopa tlacatl más cuali tlacajtosquía mictoc.

<sup>4</sup> Intla tlacajtosquía mictoc huan ax quiitztosquía tlatlanextli, ax quiipyasquía niyon itoca.

<sup>5</sup> Ax quiitztosquía tonati, niyon ax tleno quimajtosquía intla onca se tonati. Pero ya nopa noja más cuali huan ax tielis se huehuentzi tlen ax quema quimatqui paquelistli.

<sup>6</sup> Huan yonque nopa tlacatl itztosquía ome mil xihuitl, intla ax quipantía paquelistli, huajca san tlapic para itztos. Yajaya san miquis queja miquise nochí sequinoc.

<sup>7</sup> Nochi tlacame ipan tlaltepactli tlahuel mosiyahuiltíaj ipan inintequi para quitlanise tlen quicuase, pero yonque ya nopa, ax quema ixhuij ica tlen quinequij quichihuase.

<sup>8</sup> Intla timoilhuía tlen ya nopa, yonque se tlalnamijca tlacatl huan se tlen huīhuitic quipanoj ihuical tlamantli, más cuali inemilis yajaya tlen tlalnamiqui, pampa yajaya más tlamachilía. Ax nimantzi quichihuá tlen hueli tlamantli tlen quinequi quichihuas. Huan yonque se itztoc teicneltzi, más cuali eltoc intla yajaya tlalnamiqui.

<sup>9</sup> Ximopaquilismaca ica tlen tijpiya. Amo xi-jnequi tlamantli tlen ax quinamiqui para tijpiyas.

Para tijnequis tlamantli tlen ax hueli tijpiyas eli san tlapic queja tijnequisquía tiquitzquis ajacatl tlen tlailpitztoc.

*Ax tijmatij tlen hualas teipa*

<sup>10</sup> Nochi tlen ama pano eltoc pampa huejcajquiya queja nopa quisencajqui Toteco para ma pano. Huan hasta huejcajquiya Toteco ipa quimatiyaya tlachque quichihuasquía sesen tlacatl. Yeca san tlapic para timonajnanquilis ihuaya Toteco, pampa yajaya más hueyi que ta.

<sup>11</sup> Intla se tlacatl camati miyac, nel quentzi ipati tlen quijjtohua. Huajca, ax más xihuejchihua.

<sup>12</sup> Toyolis eltoc queja se ecahuilotl tlen ax huejcahua huan tlen ax tleno ipati. Axaca huelis techilhuis quejatza ma tiitztoca ica yejyectzi ipan nopa tonali tlen tijpiyaj nica. Huan ax aqui huelis techilhuis tlachque panos teipa nica ipan ni tlaltepactli quema ya tiixpolijtose.

## 7

*Tlalnamiquistli huan huihuiyotl*

<sup>1</sup> Más ipati intla nochi mitzixmatij para se ticuali tlacatl huan ax para tijhuicas nopa tlaajhuiyacayotl tlen más patiyo. Más ipati nopa tonali quema timiquise huan ax nopa tonali quema titlacatque.

<sup>2</sup> Más ipati para tiyas campa mijqui se tlacatl huan ax para tiyas campa ilhuichihuaj. Pampa ta nojquiya mitzchiya miquistli huan cuali para timoyolhuis tlen momiquilis nochi tonali tlen noja polihui ipan moyolis.

<sup>3</sup> Más cuali tijpiyas tlaohuijcayotl huan ax huetzquistli pampa nopa tlaohuijcayotl mitzpalehuis para tielis titlatzejzeloltic.

<sup>4</sup> Se tlen tlalnamiqui moyolilhuía miyac tlen miquistli tlen quinajsi nochí tlacame. Pero se tlen huihuitic san moyolilhuía quejatza mopaquilismacas ama.

<sup>5</sup> Más cuali para tijcaquis quema se tlen tlalnamiqui mitztlacahualtía huan ax quema se tlen huihuitic mitzyejyectlalis ica itlajtol.

<sup>6</sup> Pampa queja nimantzi tlamis huitzli ipan tlitl, queja nopa nimantzi tlamis nopa yejyectzi tlajtoli tlen mitzilhuijtoc nopa huihui tlacatl. Huan ax tleno mitzpalehuis.

<sup>7</sup> Tlalnamijca tlacame tlen quiselíaj se tlaxtlahuili para quichihuase tlen ax xitlahuac mocuepase huihui tlacame. Quena, nopa tlaxtlahuili quinxolehuilis inintlalnamiquilis.

<sup>8</sup> Más yejyectzi quema tijtlamiltis se tequitl huan ax quema tijpehualtis. Más cuali tijpiyas hueyi moyolo huan ax timohueyimatis.

<sup>9</sup> Amo xicualani nimantzi, pampa ya nopa tlen quichihuaj huihui tlacame.

<sup>10</sup> Ax quema xiquijto: ¿para tlen nopa tonalme tlen huecjajquiya panoque elque más cuali que ama? Ax neli tijmati intla nopa tonali elque más cuali huan intla titlalnamiqui ax ya nopa tiquijtos.

<sup>11</sup> Intla tieli titlalnamiqui, nelía cuali queja nojquiya cuali para tijselis tomi quema míquij motatahua. Quena, tlalnamiquistli huan tomi mitzpalehuis miyac ipan ni tlaltepactli.

<sup>12</sup> Tlalnamiquistli nelía tepalehuía ipan miyac tlamantli ihuical queja tomi. Pero tlalnamiquistli

noja más tepalehuía pampa se tlen tlalnamiqui huelis quimanahuis iyolis.

<sup>13</sup> Ximomaca cuenta quejatza Toteco tequiti huan ximohuica cuali iihuaya. Pampa intla Toteco quichihua huijcoltic moojhui, ax aqui hueli quichihuas xitlahuac.

<sup>14</sup> Xipaqui nochipa quema tihueli. Xipaqui ipan nopa tonali quema nochí eltoc cuali. Huan quema ajsi nopa tonali tlen fiero, ximomaca cuenta para nochí ome tlamantli tonali, huala tlen Toteco. Huan queja nopa nochí tlacame momacase cuenta para ax tojuanti tlen titlanahuatiáj quejatza elis tonemilis.

### *Ax tijmachilíaj nochí tlamantli*

<sup>15</sup> Ipan ni noyolis tlen ax ipati, niquitztoc miyac tlamantli. Niquitztoc para sequin tlacame tlen quichihuaj tlen xitlahuac iixpa Toteco miquij quema noja telpocame. Huan sequin tlacame tlen fiero ininnemilis huejcahuaj itztoque.

<sup>16</sup> Huajca amo ximochihua neltlahuel tixitlahuac, niyon neltlahuel titlalnamiqui. ¿Para tlen tijnequi timotzontlamiltis?

<sup>17</sup> Nojquiya amo ximochihua tlahuel tifiero. Huan amo ximochihua tihuihuitic. ¿Para tlen monequi timiquis quema noja aya ajsi tonali?

<sup>18</sup> Xijchihua san nopa tequitl tlen mitztocarohua tijchihuas huan amo xiquisa ipan ni lado, niyon ipan ne se lado. Intla tijchihuas ya nopa huan tiquimacas Toteco, yajaya mitztiochihuas huan nochí tlen tijchihuas, quisas cuali.

<sup>19</sup> Se tlalnamijca tlacatl quiipyá más chicahualistli que majtlactli tequihuejme ipan se altepetl.

**20** Huan ipan nochí ni tlaltepactli ax onca niyon se tlacatl tlen nochipa quichihua tlen cuali huan ax quema tlajtlacolchihua.

**21** Nojquiya amo xijchihuili cuenta nochí tlajtoli tlen tlacame quijtohuaj. Pampa huelis tijcaquis motlatequipanojca mitzijilnamiqui.

**22** Huan cuali tijmati para ta nojquiya miyac huelta tiquinijilnamictoc sequinoc mohuampoyohua.

### *Xijtemo tlalnamiquistli*

**23** Nochipa nijchijtoc campeca hasta campa ni-hueltoc para nielis nitlalnamiqui. Niquijto: “Na nijnequi nielis nitlalnamiqui”, pero san tlaptic.

**24** Nelía huejca huan ohui para tijpantis tlalnamiquistli.

**25** Nijtemo campa hueli para nijpantis nopa tlalnamiquistli huan para nijmachilis para tlen onca nochí tlamantli. Nijnequiyaya nijnextis para nelía huihuitic tlen tlajtlacolchihua. Huan locojtic tlen mohuihuichihua.

**26** Huan nijpanti para más chichic que miquistli itztoc se sihuatl tlen ahuilnemi. Yajaya itztoc queja se lazo tlen teelpía huan queja se matlatl tlen temasiltía. Aquí quichihua tlen quipactía Toteco momanahuis imaco nopa sihuatl. Pero tlajtlacolchihuani mocahuaj ilpitoque ipan imatla.

**27** NiTlamachtijquetl niquijtohua: “San ya ni nijpanti quema nijtemojtinentoc huan nitlatzin-tocatinentoc campa hueli para niquixmatis para tlen onca sesen tlamantli tlen onca.

**28** Yonque aya nijpantía tlen nijtemohuayaya, ya ni nijpantijtoc. Ipan se mil tlacame itztoque san sejodzi tlen tlalnamiqui, pero tlen nochí sihuame

campa hueli, niyon se tlen tlalnamiqui ax nijpantijtoc.

<sup>29</sup> Huan ya ni tlen nijpantijtoc. Nochi tlacame Toteco quinchijchijqui xitlahuaque, pero sese tlacatl quitlapejpenijtoc quitoquilis se ojti tlen ax cuali huan tlen yahui tlatzintla.”

## 8

<sup>1</sup> ¡Nelía yejyectzi tielis titlalnamiqui! Tlen tlalnamiqui huelis quintlajtlachilis tlamantli huan quinmachilis. Huelis quinixtomas tlamantli tlen ohui para quimachilise sequinoc. Nopa tlalnamiquistli quichihua para se tlacatl ma paqui huan ma moyolyamanili.

### *Xijneltoca nopa tlanahuatijquetl*

<sup>2</sup> Xijtlepanita itlanahuatil nopa tlanahuatijquetl pampa queja nopa tijtestigojquetztoc ica Toteco para tijchihuas.

<sup>3</sup> Amo ximoisihuilti para tiquisas tlen iixpa nopa tlanahuatijquetl. Niyon quentzi amo xijpalehui se tlamantli tlen ax cuali tlen sequin quinequij quichihuase, pampa nopa tlanahuatijquetl quintlatzacuiltis tlen ax quitlepanitaj.

<sup>4</sup> Nopa tlanahuatijquetl quipyia chicahualistli para tefuerzajhuis para quineltocase itlanahuatil. Axaca hueli quinajnanquilis o quiilhuis: “¿Para tlen tijchihua?”

<sup>5</sup> Aquí quichihuas tlen quijtohua itlanahuatil nopa tlanahuatijquetl, ax quiselis tlatzacuiltili. Huan se tlen tlalnamiqui quimati quejatza huan quema hueli quitlamichihuas nochi tlen yajaya tlanahuatía.

<sup>6</sup> Quena, sesen tlacatl hueli quipantis quema huan quejatza monequi quichihuas sesen tlamantli yonque itztoe ipan huejhueyi tlaohuijcayotl.

<sup>7</sup> Pero ax aqui quimati tlachque panos teipa. Nyon ax aqui huelis quiyolmelahuas se tlacatl tlachque ipantis.

### *Axaca momanahuis ica miquistli*

<sup>8</sup> Nyon se tlacatl quipiya chicahualistli para quitzacuilis itonal para ma ax quisas ipan itlacayo quema ya eltoc para miquis. Nyon ax aqui quipiya chicahualistli para quitzacuilis miquistli para ax quipantis. Ax onca nyon se tlamantli tlen huelis tijtequihuis para tijtzacuilis miquistli. Huan ipan nopa tonali quema ax cuajcualme itztoque para miqueise, nyon se tlen nopa tlamantli ax cuali tlen quichijtoque huelis quinpalehuis.

<sup>9</sup> Nochi ya ni tlen niquitztoc quema nimotemamac para nimoyolilhuis miyac tlen nochi tlamantli tlen pano ipan ni tlaltepactli. Niquila para tlacame tlahuel quipiyaj chicahualistli para mochihuilise tlen ax cuali se ica seyoc.

### *Tlamantli cuali huan ax cuali*

<sup>10</sup> Niquitztoc para quema miqui se tlacatl tlen tlahuel fiero inemilis huan tlen mocajtoc huejca tlen campa tlatzejzelotic, nimantzi ayoc moilhuíaj tlacame tlen nopa tlen fiero quichijqui. Ipan nopa altepetl campa quichijqui tlen fiero quitlapachohuaj ica tlatlepanitacayotl huan mocuepaj ininchaj huan quiilcahuaj nochi tlen fiero quichijqui. ¡Ya nopa nelia se hueyi huihuiyotl!

<sup>11</sup> Quema se tlacatl quichihua tlen ax cuali huan ax nimantzi quiselía se tlatzacultilistli, sequinoc moilhuise para ax tleno ininpantis intla nojquiya quichihuase fiero tlamantli.

<sup>12</sup> Pero yonque se tlacatl tlajtlacolchihuas 100 hueltas huan noja huejcahuas para itztos miyac xihuitl ipan ni tlaltepactli, na nijmati para nochiyas más cuali para tlacame tlen quiimacasij Toteco.

<sup>13</sup> Ax nelía quisas cuali para tlajtlacolchihuani pampa ax quipiyase ininnemilis tlen cuali huan tlen huejcahuas. Ininyolis elis queja se ecahuioltl, pampa ax quitlepanitaj huan quiimacasij Toteco.

<sup>14</sup> Onca sequinoc tlamantli tlen pano ipan ni tlaltepactli tlen ax nelía xitlahuac. Quemantzi tlacame tlen xitlahuaque quipantíaj tlen ax cuali queja elisquíaj tlajtlacolchihuani. Huan sequin tlajtlacolchihuani quipantíaj tlamantli tlen cuali queja elisquíaj xitlahuaque. Ya ni nojquiya se hueyi tlamantli tlen ax cuali.

<sup>15</sup> Huajca nijtlapecjeni nijtequihuis noyolis para nimopaquilismacas pampa nimoilhui para ipan ni tlaltepactli, ax onca seyoc tlamantli tlen más cuali para nijchihuas. San nitlacuas, nitlais huan nipaquis. San paquillistli mocahuas tlen nochí nopa tequitl tlen ohui tlen Toteco techmacatoc ma tijchihuaca ipan ni tlaltepactli.

<sup>16</sup> Quema senquistoc nijtemohuayaya tlalnamiquistli, niquitac nochí tlamantli tlen panoyaya ipan ni tlaltepactli. Huan niquitac para mojmostla campa hueli onca tlahuel miyac tequitl tlen mochihua tlayohua huan tonaya huan ax moquetza.

<sup>17</sup> Huan nimomacac cuenta niyon se tlacatl, yonque tlalnamiqui, ax hueli quimachilía nochi tlen Toteco quichihua, niyon nochi tlen mochihua ipan ni tlaltepactli. Huan intla se quiijtohua quimachilía nochi, ax neli melahuac itlajtol. San Toteco hueli quiita nochi tlamantli huan quimati nochi tlen onca.

## 9

*Yolistli huan miquistli*

<sup>1</sup> Nimoyolihuijtoc tlen nochi ni tlamantli huan njimati para nochi tlacame tlen xitlahuaque huan tlalnamiquini huan nochi tlamantli tlen quichihuaj eltoc imaco Toteco. Axaca quimati ajqueya quiicnelise, niyon ajqueya quicocolise pampa ax aqui quimati tlen hualas teipa.

<sup>2</sup> Ihuical tlamantli ininpanti nochi tlacame pampa nochi miquise. Ihuical ipanti tlen xitlahuac huan tlen ax xitlahuac, tlen cuali inemilis huan tlen ax cuali inemilis, tlen tlapajpactic huan tlen ax tlapajpactic iixpa Toteco, tlen temaca tlacajcahualistli huan tlen ax temaca, tlen tlatlepanita huan tlen tlajtlacolchihua, tlen tlatestigojquetza huan tlen ax tlatestigojquetza. ¡Nochi miquise!

<sup>3</sup> Nesi para amo xitlahuac para ihuical miquise nochi tlacame tlen itztoque ipan ni tlaltepactli. Yeca sequin tlacame senquistoc quichihuaj tlamantli tlen ax cuali. San quitlapejpeníaj nopa ojtli tlen más fiero pampa moihiúaj para san miquistli quinchiya.

<sup>4</sup> San tlen yoltoque noja hueli mochiyase para quiselise tlamantli tlen cuali. Huajca quiijtohuaj:

“Más cuali se chichi tlen yoltoc huan ax se león tlen mictoc.”

<sup>5</sup> Tlen yoltoque quimatiij para se tonali miquise. Pero tlen mictoque ayoc tleno quimatiij. Nojquiya ax quichiyaj para quiselise se tlaxtlahuili teipa. Huan ayoc aqui quinilnamiqui.

<sup>6</sup> Nochi tlen quichijque nica ipan tlaltepactli, intla teicnelijque, tecocolijque, quitlasomatque se tlenijqui o quiixtocaque se tlamantli, nochi ya nopa ya tlanqui. Ayoc quipiyaj ininparte ipan niyon se tlamantli tlen pano ipan ni tlaltepactli.

<sup>7</sup> Huajca xiya xitlacuati huan xiquiti moxocomeca atl ica paquilibrium ipan moyolo pampa Toteco quiita ni para cuali.

<sup>8</sup> Nochipa ximoquenti yoyomitl tlen cuali huan ximotlalili se quentzi tlaajhuiyacayotl ipan motzonteco.

<sup>9</sup> Xipaqui ihuaya nopa sihuatl tlen tiquicnelía. Quena, ipan ni yolistli ipan ni tlaltepactli tlen ax tleno ipati, xipaqui pampa noja tiyoltoc sesen tonali tlen Toteco mitzcahuilijtoc xiitzto. Pampa nopa mosihua tlen Toteco mitzmacatoc ya nopa nopa tlaxtlahuili tlen más cuali ipampa nochi nopa ohui tequitl tlen tijchijtoc ipan ni tlaltepactli.

<sup>10</sup> Nochi tlamantli tlen ajsi momaco para tijchihuas, xijchihua ica nochi nopa chicahualistli tlen tijpiya. Pampa ipan nopa mijcaostotl campa monechcahuía para tiyas, ayoc huelis tijchihuas niyon se tequitl, ayoc huelis timoyolilhuis quejatza tijchihuas se tlamantli tlen cuali. Ayoc tleno tiqximatis, niyon ayoc tijpiyas tlalnamiquilistli.

*Tlamantli nica tlen ax xitlahuac*

**11** Nojquiya niquitztoc ipan nochí tlaltepactli para ax nochipa tlatlani yajaya tlen motlalohua chicahuac. Huan ipan tlatehuijcayotl ax nochipa tlatlani yajaya tlen más quipiya tetili. Tlen nelía tlalnamiquini ax nochipa quipiyaj tlen quicuase. Tlen miyac inintlalnamiquilis ax nochipa quipiyaj miyac tomi. Tlen hueli tlalochtli, tlen hueli tlamantli ax cuali hueli quipantis aqui hueli tlacatl quema ax quichiya.

**12** Niyon se tlacatl ax quimati quema ajsis tonali para tlaijiyohuis. Queja se michi tlen majsi ipan matlatl o queja se tototl tlen mocahua ilpitoc ipan se lazo, tlen hueli tlalochtli, tlen ax cuali hueli techajsis.

### *Tlalnamiquistli huan huihuiyotl*

**13** Nojquiya niquitztoc seyoc tlamantli tlen pano ipan ni tlaltepactli.

**14** Oncayaya se pilaltepetzi campa ax itztoya miyac tlacame. Huan ajisco se hueyi tlanahuati-jquetl huan quiyahualo huan pejqui quitehuía.

**15** Pero ipan nopa pilaltepetzi itztoya se tlacatl teicneltzi tlen nelía tlalnamiqui, huan yajaya quimatqui tlachque quichihuas para quimanahuis nopa altepetl. Huan quena, ica itlalnamiquilis quimanahui nopa pilaltepetzi. Pero teipa ayoc aqui quiilnamijqui nopa teicneltzi.

**16** Huajca niquijto: “Yonque tlalnamiquistli más ipati que chicahualistli, intla tlen tlalnamiqui itztoc nel teicneltzi, ax huejcahuas quitlacaqilise itlajtol. Huan teipa nochí quicocolise.”

<sup>17</sup> Pero más cualij tijtlacaquilise icual tlajtol nopa tlacatl tlen tlalnamiqui huan ax tijtlacaquilise quema camati inintlanahuatijca huihui tlacame.

<sup>18</sup> Más cualij se quipiyas tlalnamiquistli que tepostli tlen ica tlatehuis. Pero se fiero tlacatl hueli quinxolehuas miyac tlamantli tlen cualij.

## 10

### *Tlalnamiquistli tehualiquilá tlen ipati*

<sup>1</sup> Miyac sayolime tlen mictoque huan lochon-toque hueli mijyotíaj tlahuel fiero hasta hueli quinenpolos iajhuiyaca se cualij tlaajhuiyacayotl. Ica tlacame nojquia. Intla se tlalnamijca tlacatl mocuapolos huan quichihuas se pilt-laixpanoltzi, sequinoc quiitase para nopa pilt-lamantzi quitlamiixpolos nochí nopa cualij tlamantli tlen quichijtoya ica miyac itlalnamiquilis huan ica miyac tlatlepanitacayotl.

<sup>2</sup> Iyolo se tlalnamijca tlacatl quichihualtía ma quichihua tlen cualij. Pero iyolo se huihui tlacatl quichihualtía ma quichihua tlamantli tlen ax cualij.

<sup>3</sup> Quema se huihui tlacatl san nejnemi ipan se ojtili quinnextilá sequinoc para quipolohua itlalnamiquilis. Quena, tlacame quitaj quejatza nemí huan nimantzi quiixmatij para huihuitic.

<sup>4</sup> Intla moteco cualanis mohuaya, amo xijcahua motequi. San ximoicnonequi huan ximomaxotili. Ya nopa mitzpalehuis para tijsehuis icualancayo moteco huan para ax tiquixpanos.

<sup>5</sup> Niquitztoc seyoc tlamantli tlen ax cualij tlen pano ipan ni tlaltepactli; se tlamantli tlen pano ica tlanahuatiani.

**6** Fiero eltoc intla se tlanahuatijquetl quincahuilis ma tlanahuatica tlacame tlen huihuitique huan quintlalía tlacame tlen ya quinextijtoque inintlalnamiquilis ipan se tequitl tlen axaca quitlepanita.

**7** Nojquia niquinitzto tequipanohuani tlen yahuij cahuajtipa huan inintlayacancahua nejne-mij iniicxipa queja elisquíaj tequipanohuani.

**8** Tlalnamiquini quimatiij onca tlamantli mahuilili huan tequitij ica miyac cuidado. Tlen quixahuas se ostotl para ameli, huelis iseli huetzis nopano. Tlen quixolehuas se tepamitl, huelis nopano quipantis se cohuatl tlen quitzacanis.

**9** Aqui quiqxintia tetl ipan tepexitl para quitejtequis, huelis quihuelonis tetini tlen ica motepachos. Huan ajqueya quitlapana cuahuitl, huelis mococos iseli ica nopa hacha o ica nopa cuahuitl. Huajca tlen tlalnamiqui tequitij ica cuidado.

**10** Intla nopa hacha ayoc tlatequi huan se tlacatl ax quitentis, monequi más chicahuac tlatzonquequis para quitlapanas cuahuitl. Huajca tlen nelia tlalnamiqui quitentia ihacha para quisas cuali itequi.

**11** Ax ipati para tijtemos se tlamaxojtilijquetl para quimaxojtilis se cohuatl intla ya mitztzacanijtoc.

**12** Se tlalnamijca tlacatl camati ica yejyectzi pampa hueyi iyolo ica sequinoc. Pero itlajtol se huihui tlacatl quichihua ma monenpolo ica iselti.

**13** Quema pehua camati se huihui tlacatl quijjtohua tlen moilhuia huan ya nopa huihuitic. Pero

quema ontlami ica nochí tlamantli tlen moyolil-huijtoc, itztoc queja se loco tlacatl huan teilhuía nochí tlen ax cuali tlen quinequi quichihuas.

<sup>14</sup> Se huihui tlacatl camati miyac queja elisquía quimati nochí tlen panos teipa huan quinequi tepohuilis nochí. Pero ax neli. Axaca quimati tlen panos teipa.

<sup>15</sup> Quema se huihui tlacatl tequiti, mosiyahuiltía hasta ayoc quimati quejatza ajsiti ichaj.

<sup>16</sup> Fiero elis para nopa tlali tlen quipiya queja itlanahuatijca se tlen aya motlalnamictijtoc. Teicnelti nopa tlali intla itlayacancahua pehuaj moi-huintíaj hasta quema tlanesi.

<sup>17</sup> Pero se paquelistli para nopa tlali tlen quipiya se cuali tlacatl queja itlanahuatijca, huan quinpiya itlayacancahua tlen san quicuaj tlen monequi para huelise tequitise chicahuac. Ax tlahuel tlacuaj huan moi-huintíaj.

<sup>18</sup> Se tlacatl tlen tlatzihui ax quitlatlamanía ichaj campa pano atl, huan yeca palani iapechohua. Teipa postequi nopa apechtlí huan huetzi ichaj.

<sup>19</sup> Para mopaquilismacase tlacame quichihuaj se ilhuitl. Huan nopano xocomeca atl temaca paquelistli. Pero monequi tomi para nochí tlen mochihua.

<sup>20</sup> Nyon ixtacatzi ipan moyolo, ax quema xitelpelchihua se tlanahuatijquetl o se rico, pampa huelis se tototl quicaquis huan quipohuiliti.

## 11

### *Xitemajmaca miyac*

<sup>1</sup> Xitemajmaca miyac pampa teipa, ica miyac tonali, sampa ajsiqui momaco.

<sup>2</sup> Xiquinmajmaca tlen tijpiya ica miyac tlacame, pampa ax tijmati tlen hualas mostla huan intla ta nojquiya tijtemos tlen mitzmonequilía.

<sup>3</sup> Quema nopa mixtli quihualica miyac atl, nopa atl huetzi quema quinequi ipan tlali. Huan intla se cuahuitl huetzis, campa quinequis huetzis yonque ica ajco o ica tlani, nopano mocahuas.

<sup>4</sup> Intla tijchiyas ma mijcuini nochí ajacatl huan ma ayoc tlaahuetzi para tijchihuas se tequitl, huelis ax quema tijchihuas.

<sup>5</sup> Queja se tlacatl ax quimati canque huala nopa ajacatl huan ax quimati quejatza moscaltía se pilconetzi ipan iiji inana, queja nopa nojquiya se tlacatl ax hueli quimatis quejatza tequiti Toteco, yajaya tlen quichihua nochí tlamantli.

<sup>6</sup> Xijsenhuiquili xijtoca moxinach ica ijnaloc huan nojquiya xijtoca ica tiotlac. Pampa ax tijmati catlía xinachtli ixhuas huan quisas más cuali. Huelis más ixhuas tlen tijtojqui ica ijnaloc, o huelis tlen tijtojqui ica tiotlac o huelis nochí ome ihuical quipiyase inintlajca tlen cuali.

### *Xiquilnamiqui Toteco ama*

<sup>7</sup> Tlahuel yejyectzi tlahuili. Nelía cuali para tiitztos huan tiquitas tonati.

<sup>8</sup> Yonque se tlacatl itztos miyac xihuitl ipan ni tlaltepactli, sesen tonali ma quipiya paquilstli. Huan nojquiya ma quilnamiquis para teipa hualas tonali tlen tzintlayohuilotl quema ya mictos. Pampa nochí tlamantli tlen hualas elis san tlapic.

### *Tlajtoli para telpocame*

<sup>9</sup> Huajca ta tlen titelpocatl, ximopaquilismaca amantzi quema noja titelpoca tlacatl. Xiyolpaqui ama. Xijchihua nochi tlen cuali tlen moyolo quinequi tijchihuas. Xijyeco nochi tlen onca. Pero xijmati ya ni; ajsis se tonali quema timoquetzas iixpa Toteco para tijmacas cuenta tlen nochi tlen tijchijtoc.

<sup>10</sup> Huajca xijhuejcamajcahua cualantli, cuesoli huan nochi tlen ax cuali tlen hueli mitzcocos. Yonque ama tiitztoc titelpocatl quema monemilis eltoc tlahuel yejyectzi, ni tonali ax huejcahuas huan tijpantis para ni xihuitl nojquiya panos queja ax tleno eliyaya.

## 12

<sup>1</sup> Xiquilnamiqui Toteco tlen mitzchijchijqui quema noja tiitztoc titelpocatl. Xijhueyitlepanita amantzi quema tiitztoc titelpocatl huan aya huala nopa tonali quema ayoc tijpiyas paquillistli para tiitztos.

<sup>2</sup> Pampa teipa ayoc huelis titlachiwas cuali huan tiquinitas tonati, metztlí huan sitlalime queja ya tzintlayohuilijque. Huan yonque ya tlanqui tlaahuetzis, motlalnamiquilis mocahuas queja tlamixtentoc.

<sup>3</sup> Hualas tonali quema nopa huehuejyotl mitzchihuas tihuihuipicas huan mometzhua tlen quipixque miyac chicahualistli, ayoc quipiyase. Ayoc tijpiyas nochi motlancoch para tijcuajcuas cuali huan elis queja titlachiya ipan ventanas tlen soquiyó.

<sup>4</sup> Huan quema ya tiquinpolojtos motlancochhua, monequis timotentetzopas

chicahuac para huelis tijchichicuetzas motlacualis. Teipa ajsis tonali quema timehuas cualca quema aya tzajtzij cuapelechme pampa ax huelis ticochis. Pero ta ayoc titlacaquis cuali huan motlajtol ayoc caquistis cuali.

<sup>5</sup> Teipa ta tiquimacasis titlejcos campa tlahuejcapa huan tiquimacasis tihuetzis quema tinejnemis. Tielis se huehuentzi tzonchipahuac. Huan tihuahuatatzas motlacayo. Ayoc tijnequis tipaquis ihuaya mosihua. Tiitztos nechca miquistli. Quena, timquis huan tiyas ipan tlen elis mochaj para nochipa. Huan nopa tlacame tlen mitzchoquilise itztose ipan calle.

<sup>6</sup> Xiquilnamiqui Toteco ama quema titelpocatl huan noja titetic. Xijtequipano ama quema motzonterco noja quinahuatía moyolo ma huitoni huan moeso noja nemí ipan motlacayo. Amo xijchiya hasta ayoc huelis titlaijyotilanas huan motlalnamiquilis ayoc tleno quimatis.

<sup>7</sup> Xijchihua ama quema motlacayo aya mocuepa tlaltejpoctli queja achtohui eltoya huan motoral aya mocuepa ica Toteco tlen quihualtitlanqui.

<sup>8</sup> “Nochi san tlapic huan ax tleno ipati.” Queja nopa niquipohua na tlen niTlamachtijquetl. ¡Quena, nochí san tlapic!

### *Tlen más monequi tijchihuase*

<sup>9</sup> Huan na tlen niTlamachtijquetl ax san tlahuel nitlalnamiqui pero nojquiya nijsenhuiquili niquinmacti tlacame nochí tlen njmatiyaya. Nojquiya niquipohua miyac tlajtoli tlen inintoca proverbios.

<sup>10</sup> Huan niTlamachtijquetl nijtemo tlajtoli tlen yejyectzi para ica nitlamachtis. Huan nojquiya niquijcuilohuayaya tlajtoli tlen senquistoc melahuac.

<sup>11</sup> Itlajtol se tlalnamijca tlacatl quinfuerzajhuía sequinoc ma quichihuaca tlen cuali. Quinnextilía sequinoc nopa tlamantli tlen achi más ipati. Itlajtol se tlalnamijca tlacatl teyacana ipan se cuali ojtlí queja se tlamocuitlahuijquetl quichihua.

<sup>12</sup> Pero ta tinocone, nimitzilhuía ax quema tlamic tlacame para quiijcuilose más amatlapohuali. Huan tlen momachtía miyac mosiyahuiltía miyac.

<sup>13</sup> Tlen nochí tlajtoli tlen niquijtojtoc huan tlen inquicactoque, ya ni tlen más ipati para nimitzilhuis: “Xiquimacasi Toteco huan xijchihua tlen quiijtohua itlanahuatilhua. San ya nopa tlen monequí quichihuase nochí tlacame.

<sup>14</sup> Pampa Toteco Dios techtlajtolsencahuas ipampa nochí tlen tijchihuaj, yonque tijchihuaj nempa o ixtacatzi, huan yonque cuali o ax cuali.”

**Itlajtol toteco: Santa Biblia  
Bible without Deuterocanon in Nahuatl, Huasteca  
Oriental (MX:nheBI:Nahuatl, Huasteca Oriental)**

copyright © 2005 Wycliffe Bible Translators, Inc.

Language: Nahuatl, Huasteca Oriental

Dialect: Huasteca Oriental

Translation by: Wycliffe Bible Translators, Inc.

Náhuatl, Huasteca Oriental [nhe], Mexico

**Copyright Information**

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Nahuatl, Huasteca Oriental

**© 2005, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

6e359f6d-e93f-5d56-819d-a3feae810a1b